

新刊

周禮全經

十



周禮全經卷之十

夏官下

司士掌群臣之版以治其政令歲登下其損益之數辨其年歲與其貴賤周知邦國都家縣鄙之數卿大夫士庶子之數以詔王治

釋曰版方板名籍也群臣之版凡在位在職之名籍也治其政令以詔王治蓋辨賢否高下以詔王爲廢置之舉此其政令也賢而上其籍謂之益而登之也不賢退廢去其籍謂損而下之也歲一更其籍三年而後進退之辨其年則以知其齒之壯

老辨其歲則以知其任之久近貴謂大夫以上及
世代仕宦者賤謂士以下及世代庶人者或曰以
有德加爵爲貴以任職不加爵與降爵爲賤亦通
邦國列國諸侯也都家卿大夫食采者也縣鄙大
夫士之祿在六遂之外也庶子卿大夫士之支子
衆子也周知諸侯之數考畿外諸侯所承襲之人
也周知都家縣鄙之數考國中任職之人也周知
卿大夫士庶子之數祿其賢者將用之餘以衛王
宮也詔王治賢否必以告王而使王廢置之也王
制曰司馬辨論官材論進士之賢者以告於王而

定其論論定然後官之任官而後爵之位定而後
祿之則司士之職也

以德詔爵以功詔祿以能詔事以久奠食唯賜無常

釋曰凡公侯伯子男五等通於天下公孤卿即上
大夫三大夫三士六等施於國中皆爵也爵以授
德則賢者在位之選也故有德則告於王而爵之
自諸侯之士下王朝之士一等下士視上農倍至
君十卿祿皆所謂祿也祿以酬功故有功者告於
王而祿之故有德則有爵有才則有功爵祿必相
須德其本也祿亦以賦賢者在位之爵也事者職

之事也。職有大小，能之大小，稱之。故有才能者則告於王，使各任以職事。此能者在職之選也。食者任職之廩俸也。食有多寡，治之大小，稱之。事成於久任，則有成績。然後廩餼可稱其事也。不詔王者，乃所當得之稍食也。故以德詔爵，所以貴之；以功詔祿，所以富之；以能詔事，所以任之；以久定食，所以養之。先王治官之灋，亦盡於此矣。書曰：德懋懋官，功懋懋賞。建官惟賢，位事惟能。此之謂也。唯賜無常者，賜出於王之特恩。八柄，王所執也。恩有輕重，則賜有厚薄。何常之有？謂不可以有司之灋制。

絕之也。

正朝儀之位，辨其貴賤之等。王南鄉，三公北面，東上。孤東面，北上。卿大夫西面，北上。王族故士、虎士在路門之右，南面，東上。大僕大右，大僕從者在路門之左。南面，西上。司士擯，孤、卿特揖，大夫以其等旅揖，士旁三揖。王還揖，門左揖，門右大僕前，王入內朝，皆退。釋曰：人君之眡治朝也。自公、孤、卿、大夫以至宿衛之士，僕從之臣，皆有常位，正其位，使不差，辨其等，使不亂。司士之職也。鄉明以聽天下者，王故。王南鄉，鄉王而答之者，三公故。三公北面，孤佑王者也。

禮記卷之十一 卷之十一 三
故東面卿大夫佐王者也故西面王族故士虎士
大僕大右太僕從者則從王者也順王所向故南
面三公東上則北面以東爲右故也自孤以下則
皆迎尊爲上公以上皆言面王獨言鄉其體尊故
也鄭氏曰王族故士故爲士晚退留宿衛者也未
嘗仕雖王族不得在王宮大右司右也太僕從者
小臣祭僕御僕隸僕是也司士擯詔王出揖公卿
以下朝者也卿大夫士皆君之所揖禮春秋傳所
謂三揖在下者也特揖一一揖之旅衆也大夫爵
同者衆揖之公及孤卿大夫始入門右皆北面東

上王揖之乃就位三孤六卿尊故特揖之大夫卑
於孤故中大夫下大夫各以等而衆揖之士又卑
於大夫故上士中士下士旁三揖焉王還門左揖
門右則在門左右者皆南向故也太僕前正王位
故也王入內朝皆退王視事於治朝既畢而入內
朝則事官皆退也內朝在路門內亦謂之燕朝
掌國中之士治凡其戒令掌擯士者膳其摯凡祭祀
掌士之戒令詔相其灋事及賜爵呼昭穆而進之帥
其屬而割牲羞俎豆凡會同作士從賓客亦如之作
士適四方使爲介

釋曰士治士之仕於王國者治其進退損益也與其告戒命令皆掌於司士焉擯士者告見初爲士者於王也膳其摯所執羔鴈之摯入於王之膳人以示納用其德也祭祀群臣之有事者皆掌其戒令也灋祭祀之灋度事行禮之事也皆司士詔相之賜爵神惠及下也謂祭祀畢旅酬無算爵之時皆有酒賜及王之子姓兄弟司士呼昭穆而進之祭統曰凡賜爵昭爲一穆爲一昭與齒穆與穆齒凡羣有司皆以齒此之謂也凡有割牲及進俎豆之事皆帥其屬以爲之會同作士從者選其行藝

而進之以從王也迎待賓客亦司士選士焉若王選士使適四方司士則使士爲之介如上卿使則大夫爲之介大夫使士爲之介蓋命使者王之事選介則司士揖之焉

大喪作士掌事作六軍之士執披凡士之有守者令哭無去守國有故則致士而頒其守

釋曰大喪掌奠歛及各執事皆司士選其士使任之披柩車所以持棺者有紐以結之謂之戴披六軍之士大司馬所掌亦司士作之守喪事之官守也又令有執於喪者雖哭不得去守官不可空也

國有故兵與災也亦司士召致諸士頒其執事之
 守也故選任之權皆掌於司士所謂以能詔事也
 是理財用人二者治天下之要務也生財在司空
 理財在冢宰教人在司徒用人在司馬司士司馬
 之屬也此意之不明久矣

凡邦國三歲則稽其士任而進退其爵祿

釋曰自頒其守以上皆言王國之中者故曰掌國
 中之士治此則言掌侯國之士治也故曰凡邦國
 然王國無時不稽士任而考課之權在冢宰邦國
 則三歲稽其士任而考課之權在司馬蓋司馬專

掌諸侯故也邦國之臣進退爵祿皆司士掌之則

豈如後世封建一任其君所治而天子不與聞耶

○王昭禹曰邦國之士皆命於王其任有勤惰爵

祿有進退者則司士有三載而稽考之此黜陟勸

沮之灋所以皆本於王朝而國無異政也春秋之

時列國之爵位名號皆自已出故孔子譏之

葉氏曰司士以久奠食又曰凡邦國三歲則稽士

任而進退其爵祿以三年為任官之定制而升降

黜陟之灋乃視此為進退歟是灋也不惟行於王

畿而通行於邦國都鄙矣蓋古人爵人以德不觀

其暫而觀其常，祿人以功，不觀其驟而觀其素，任事以能不揆其始而揆其終，議論要諸久而後定，功效要諸久而後成，此先王所以久於任人而不驟遷也。唐虞任人之灋，必三載而後考績，三考而後黜陟，何也？唐虞之官簡，故九載而黜陟，成周之官衆，故三年而誅賞。太宰雖曰歲終詔王廢置而群吏之灋亦必待三年然後太計而誅賞之。孔子曰：如有用我者，三年有成，子路亦以及三年而可足，民皆以三年而觀政也。此其爲中制而可爲賢能遷轉之叙明矣。然司士所稽者，士任爾大臣如

公侯伯之有功德者，又豈可以例遷乎？內而周公爲太師，召公爲太保，外而康叔之治殷民，君陳之正周郊，苟稱其職，終其身而任之也。豈若後世錄功勞以計進，守歲月而希遷哉？

諸子掌國子之倅，掌其戒令，與其教治，辨其等正，其位國有大事則帥國子而致於太子，唯所用之。若有兵甲之事，則授之車甲，合其卒伍，置其有司，以軍灋治之。司馬弗正，凡國正弗及。倅七內反

釋曰：倅，貳也。國子，王庶子，公卿大夫元士之子，皆謂之國子。其適子則受業於師氏，保氏其成材，受

業於大司樂其庶而介於適子者則爲國子之倅諸子掌之以宿衛王宮者也而宮正亦領之焉戒令告戒命令也若致於太子之事教治脩德學道也辨其等以父之爵爲等明貴賤也位朝位次序也鄭氏曰凡入學以齒則叙其齒以爲之位也大事軍旅之事也國子即其倅貳也致於太子者公卿大夫士則聽於王其子則聽於太子休戚同之所以同心一體無異慮也唯所用聽天子之驅使也兵甲之事則或寇戎侵及郊畿也授以車則馬可知授以甲則兵可知合其卒伍百人爲卒伍人

爲伍置其有司謂伍長兩司馬卒正之數臨時聯合其卒伍立其長帥以行征伐也可見鄉遂之卒伍亦必臨時簡稽而聯合之以軍灋治之其造作進退一如軍旅之事司馬弗征以爲國之貴游故司馬不得以兵賦征之也國征謂鄉遂起甸徒力役之事皆弗及也○李氏曰大哉王者之師其備矣乎非直興於閭里而又取諸世族彼以父祖貴富宜有報上之心况學習德行道藝孰不知忠孝之美任之以金革與夫干賞而蹈利庸徒鬻賣者蓋有間矣且太子將爲君國子將爲臣君臣之分

未定而恩義固已接於今日之遊倅未必不爲嗣王之將帥也又王世子曰公若有出疆之政庶子以公族之無事者守於公官正室守太廟諸父守貴宮貴室諸子諸孫守下宮下室此諸侯禮也豈天子之事而有不用力者乎

大祭祀正六牲之體凡樂事正舞位授舞器大喪正群子之服位會同賓客作群子從凡國之政事國子存遊倅使之脩德學道春合諸學秋合諸射以攷其藝而造選之

釋曰劉氏曰諸子學禮樂詩書將世其父而未之

用也割牲體羞俎豆則已仕者爲之而司士掌之諸子則泣而觀之朝踐而豚解必腥以獻也醑尸而體解必熟以獻也至於犬豕牛羊則升首薦血六牲之體必叙以獻苟失其叙有不中禮則諸子正而叙之故曰正六牲之體習之以其行也位佾處也正舞位謂國子之在舞位也授舞器則國子之用舞器也蓋先王之教國子成之以樂而大司樂教之也國子亦謂之群子者凡庶子居而衆者名之也從從王也服位喪服之次哭泣之位也國之政事若征役兵甲之事存者凡人皆役之獨存

國子不役使之在學以養之也遊倅謂介子副貳適子未仕而遊暇無事者德德行道道藝學學宮射射宮也國子存而不役者使之自脩其三德六行習學其道術藝業以成其德達其材也春合諸學教以詩書秋合諸射教以禮樂必合之者所以攷其才藝長者進而用之短者退之使習業也

原曰古者國子遊倅不入於師保二氏不入於司徒之教故特設諸子以統治教誨之其成材者則進之太學叙用之其未有賢行可名者則屬之宮伯以宿衛王宮至於掌固亦用庶子焉其又下者

耳可以見古人待世族庶子之意矣後世大夫士之庶子列於下民而宿衛者又專用武人天子諸侯之庶子無問賢愚槩以爵位驕其肥遯之志廢其向用之心烏乎可哉

司右掌群右之政令凡軍旅會同合其車之率伍而比其乘屬其右凡國之勇力之士能用五兵者屬焉掌其政令

釋曰車有五等右者三右下文戎右齊右道右也戎右兼田右齊右兼玉路之右車之卒伍所謂兵車也合比屬者使之次第相安習也左氏稱其君

之戎分為二廣廣有一卒卒備之兩司馬灋曰二十五乘為偏百二十五乘為伍故車有卒伍者周之遺灋也比其乘者比其所乘之馬使之齊力屬其右者屬其為右之人使之同心車右必任勇力之止故凡有勇力者習之以五兵選之為右也司馬灋曰弓矢圍笈矛守戈戟戰凡五兵長以衛短短以救長則會同而卒伍其車者有文事者必有武備也。○王介甫曰先王既合萬民之卒伍以時習之皆使知戰矣又屬勇力之士能用五兵者於司右而使掌其政令則軍旅之事有選鋒以待敵

齊民得免死焉無事之時武夫皆制於官府無所奮其私鬪矣

虎賁氏掌先後王而趨以卒伍軍旅會同亦如之舍則守王閑王在國則守王宮國有大故則守王門大喪亦如之及葬從遣車而哭適四方使則從士大夫若道路不通有徵事則奉書以使於四方

賁音奔先悉荐反

釋曰虎賁主於衛王故王車之行擁衛前後雖趨而不失行列也舍王所止宿處閑榭桓也守王宮為周衛也守王門非常之難要在門也故王出而舍於外則以虎士守榭桓王入而在於國則以虎

士守王宮國有災兵則以虎士守王門所謂掌先後王者也遣車王之魂魄所依故從之而哭士大夫使於四方則以虎士從之護王命也道路不通有兵寇之故也有徵事徵師役之事也必以虎士謂其勇猛有力可爲使用以徵兵於四方也

呂氏曰周人戒成王曰王左右常伯常任準人綴衣虎賁任人牧夫準人固是係天下安危所當戒綴衣虎賁只是侍御僕臣何故與任牧準人同說而無輕重此最是周公養成君德深厚處大抵外朝之人人君臨朝方得入覲而人君又見其望高

德厚待之尊嚴不敢褻近惟侍御僕從朝夕與之親比若得正人動作起居陰化默移湏到聖賢地位若讒諂面諛之人朝夕與之相處便到失德處故綴衣虎賁位最賤職最親所以不特是常伯常任準人要得人而虎賁綴衣亦要得人

旅賁氏掌執戈盾夾王車而趨左八人右八人車止則持輪凡祭祀會同賓客則服而趨喪紀則衰葛執戈盾軍旅則介而趨

釋曰夾王車者其下士也下士十有六人中士爲之帥焉此王衛之猶親者也以膂力剛強之士爲

之車止持輪使王車安固也服而趨夾王車而趨也王齋服服衮冕則此士之齊服服玄端也臣為王服斬衰麻經至葬乃服葛經也介被甲也既衛王之行則從王之服而已王吉服則亦吉服王凶服則亦凶服王戎服則亦戎服也

節服氏掌祭祀朝覲衮冕六人維王之大常諸侯則四人其服亦如之郊祀裘冕二人執戈送逆尸從車釋曰服衮冕者從王服也維持之也祭祀朝覲王建大常之旗其旗十二旂兩兩以縷綴連旁三人持之諸侯殺於王故建交龍之旗而四人持之其

服亦如諸侯之服也裘大裘也裘冕者亦從尸服也逆尸送尸皆執戈而從尸車之後郊祀亦用尸也

方相氏掌蒙熊皮黃金四目玄衣朱裳執戈揚盾帥百隸而時儺以索室歐疫大喪先匱及墓入壙以戈擊四隅歐方良

難乃多反歐起俱反方音周良音兩先音薦

釋曰蒙冒也冒熊皮取其毅而致果足以驚疫癘之鬼也黃金四目取其視無不見也黃者中之色金則剛而明剛中而明足以察見陰慝也執戈揚盾所以致其威也帥百隸夷隸罪隸之屬也時儺

以時而讎也。月令於季春之讎曰：畢春氣，仲秋之讎曰：達秋氣。季冬則命有司大讎是也。以索室則歐疫入室中，索厲鬼而逐之也。先匱爲之前導也。壙穿地爲穴以葬也。方良罔兩也。歐罔兩以安王神也。天子之椁，栢黃腸爲裏而表以石焉。國語曰：木石之怪曰夔罔兩。

大僕掌正王之服，位出入王之大命，掌諸侯之復逆。王眡朝則前正位而退，入亦如之。建路鼓于大寢之門外而掌其政，以待達窮者與遽令。聞鼓聲則速逆。御僕與御庶子。

釋曰：僕侍御於尊者之稱，是親近王所之官。故王之衣服及位處，恐其不正，故皆正之也。出大命，王之教令也。入大命，群臣承意而復命也。復有所報白也。逆有所陳奏也。○王氏曰：有諸侯之復逆，有公孤卿之復逆，有吏民之復逆，皆所以通上下之情。諸侯復逆，掌之大僕；諸臣復逆，掌之小臣；吏民復逆，掌之御僕。皆以位之尊卑爲之次第也。若宰夫則曰：諸臣之復，萬民之逆。夫復者，雖爲諸臣言之，而民亦未始不復。雖爲萬民言之，而吏亦未始不逆。是以御僕又云：諸臣之逆，庶民之復。是知復

逆者通于上下也。王眡朝，眡治朝也。大僕本位在路門之左，今進前正王位而退復本位也。王退入路寢，大僕亦前正其位也。大寢路寢也，其門外則內朝之中，路鼓四面示欲四方無所不達也。其政鼓節之早晏也，窮謂窮究，失職無所控訴也。遽令謂急遽之令，二者欲其聞之速也。故使之鳴鼓，馬大僕聞有鳴鼓者，則速逆御僕與御庶子當受其事以聞，蓋此二官皆直事鼓所者。

禮賓客喪紀正王之服位，詔灋儀贊王牲事，王出入則左馭而前驅，凡軍旅田役贊王鼓，救日月亦如之。大喪始崩，戒鼓傳達于四方，窆亦如之。縣喪首服之灋于宮門。

釋曰：詔告也。詔王之灋儀，正其容貌威儀，使中於禮也。王之牲事以事鬼神也。大臣衆矣，莫尊於太宰，近臣衆矣，莫親於大僕，故贊牲事以此兩官也。前驅道引也。道而居左，自馭不參乘，避王也。亦有車右焉。軍旅田役，主皆親執鼓，路鼓四面，大僕佐擊其餘面也。日月薄蝕，則擊鼓以祛陰慝。大僕亦贊其事，戒鼓擊鼓以警衆也。傳達于四方，通擊以相傳報也。窆，葬下棺也。首服之灋，謂免髮笄總長。

短之數也。縣其灋于宮門，示四方以爲灋戒也。掌三公孤卿之弔勞。王燕飲則相其灋，王射則贊弓矢。王眡燕朝則正位，掌擯相王不眡朝則辭於三公及孤卿。

釋曰：弔，勞。王使往也。王與諸侯及群臣有燕，所以示慈惠。其飲雖無酌數，然亦有灋。故大僕相之也。王之大射燕射，大僕贊弓矢授之受之也。燕朝內朝，王與族人燕處，大僕皆正其位，擯則助賓，相則助王。大僕掌之，辭謂以不眡朝之意而告之也。

小臣掌王之小命，詔相王之小灋。儀掌三公及孤卿之復逆。正王之燕服位，王之燕出入則前驅。大祭祀朝覲沃盥，小祭祀賓客饗食，賓射掌事。如大僕之灋，掌士大夫之弔勞，凡大事佐大僕。

釋曰：小臣，大僕之小者。小命，時事所勅問也。小灋，儀趨行拱揖之容。太僕掌諸侯之復逆，故小臣掌三公孤卿之復逆也。燕服位，朝退而適燕寢，則正其服位也。燕出入，燕私之出入。若今遊幸諸觀苑，則馭而前驅也。沃盥者，以水灌王手，所以致潔也。祭祀以接神，朝覲以接人，盥手所以爲敬。賓射與諸侯來朝者射，三公孤卿之弔勞，大僕掌之，故

小臣掌士大夫之弔勞也大事佐大僕所以爲副貳也

王氏曰夏官大僕小臣之於王天官內小臣內豎之於后其職一也內小臣掌王后之命正其服位出入則前驅而太僕掌正王之服位出入王之大命王出入則前驅是太僕之職與小臣同內豎云掌內外之通令凡小事小臣云掌王之小命是小臣之職與內豎同然大者掌其大小者掌其小此太僕小臣之職所以分也至於內小臣之所掌宜言掌后之小命也今乃曰掌王后之命而其通令

凡小事則內豎掌之所以見后之次於王也况后言命不言大命后只有好令于卿大夫曾何大命之有是知大命皆出於王也周之時后且不預王之命况他人乎後世陪臣執國命豈不可嘆哉祭僕掌受命于王以眡祭祀而警戒祭祀有司糾百官之戒具既祭帥羣有司而反命以王命勞之誅其不敬者大喪復于小廟凡祭祀王之所不與則賜之禽都家亦如之凡祭祀致福者展而受之

釋曰謂王有故不親祭也祭祀有司有事於祭祀者糾謂校錄所當共之牲物○劉氏曰王之於祭

祀也。冢宰正其綱，宗伯正其職，六官之屬各抵其事。先期誓戒，擇賢執事，齋戒滌濯，可謂盡其誠敬。備乎禮文矣。而具脩之初，王不得以躬胝之也。乃設祭，僕之職專受王命，以胝祭祀，而警戒祭祀。有司糾百官之戒，具是代王躬胝其事也。聖人之於鬼神，盡心如此。故以祭則饗帝而受福也。已祭帥卒，有司復命。凡與祭有司敬其事者，以王命勞之。有不敬者，以王命責之也。小廟，高祖以下廟也。祭僕復于小廟，夏采復于大廟。始祖曰大廟，祭祀王同姓有先王之廟者，有故不與祭，則賜之禽。使自祭也。都家亦如之。同姓在都家者，必不得與祭，亦賜之禽也。祭祀致福者，謂臣有祭祀，必致祭肉於君。所謂歸胙也。展，錄視其牲體之數。以胙自外至，受而膳王，故敬慎如此。

御僕掌羣吏之逆，及庶民之復，與其弔勞。大祭祀相盥，而登大喪持翬，掌王之燕令，以序守路鼓。

翼所
甲反

釋曰：小臣掌三公孤卿之復，逆士大夫之弔勞，故御僕掌羣吏之逆，庶民之復，與弔勞也。庶民之復，即大司寇所謂遠近惇獨老幼，欲有復于上者也。故太僕言建路鼓以待達窮者，聞鼓聲則速逆御。

僕是也小臣沃盥則御僕相盥者捧盤受巾也登
爲王登牲體於俎也萋飾棺也燕令燕居時之令
也序更御僕下士十有二人以序更守路鼓以待
達窮與遽令也

隸僕掌五寢之掃除糞洒之事祭祀脩寢王行洗乘
石掌蹕宮中之事大喪復于小寢大寢

釋曰宮人掌王宮六寢之脩則王宮之事隸僕掌
五寢之掃除則宗廟之事也王者七廟而云五寢
者二祧無寢故也可見王者之廟亦二昭二穆與
太祖之廟而五二祧無寢可見無三昭三穆之說

矣祭祀脩寢或有事焉月令凡新物先薦寢廟是
也乘石王所登上車之石也蹕止行人者宮中有
事則蹕是故脩之所以治壞洗之所致潔蹕之
所以警備僕之所有事也始祖廟之寢曰大寢高
祖以下之寢曰小寢

葉氏曰周有三朝一曰燕朝在路門之內王國宗
人嘉事之朝也太僕小臣掌焉一曰治朝在路門
之外王日聽治之朝也宰夫司士掌焉一曰外朝
在庫門之外詢萬民聽政之朝也小司寇朝士掌
焉外朝之位朝士所掌朝灋鄉大夫以大詢之時

帥六鄉之衆庶而致於朝百姓衆庶得與公卿侯伯群士群吏相先後於階陛之間其政誠爲平易近民矣治朝之位司士所正之朝儀而宰夫掌其灋太僕掌建路鼓于大寢門外以待達窮與遽令宰夫掌庶民之逆得與賓客治諸臣之復同徹於天子之前則又未嘗以禁嚴爲限矣燕朝之灋雖在太僕然諸侯復逆掌於太僕三公孤卿復逆掌於小臣群吏庶民之復逆又掌於御僕是庶民之復得與諸侯公卿群吏達於燕處之時則亦未嘗以邃深爲隔矣觀三朝之灋則知成周盛時戶庭

無壅其踈通洞達何如哉然外朝雖掌於秋官之屬而三公孤卿在焉則太宰與聞外朝之政矣治朝雖曰司士正之屬於夏官而宰夫掌其禁令王眡治朝冢宰贊之則太宰實聞治朝之事矣燕朝亦夏官之屬也然則群臣之復逆實與宰夫相關焉况建鼓在路門外王眡治朝則太僕正位王不眡朝則辭於三公及孤卿是燕朝之臣實與治朝相通則太宰亦與聞乎燕朝之政矣以此見周人之治宮中府中實爲一體而無內外之分矣
弁師掌王之五冕皆玄冕朱裏延紐五采纁十有二

就皆五采玉十有二玉笄朱紘諸侯之纁旒九就璿玉三采其餘如王之事纁旒皆就玉瑱玉笄纁音早

釋曰王冕有六大裘冕衮冕鷩冕毳冕希冕玄冕而此云五冕者祀昊天上帝服大裘則服衮可知矣故大裘與衮同一冕也冕以版爲之廣八寸長六寸上以玄下以朱覆之延即冕之覆而在上者紐小鼻也自下而視則延長故謂之延紐綴於武上四旁以笄貫之使其牢固也纁雜文之名也合五采絲爲之繩貫五采玉垂於延之前後各十二旒所謂前後邃延也就成也以五采玉相間用五

采纁貫而垂之每就各十有二旒也故五采備色也就十有二備數也玉十有二備物也玉笄以玉爲笄橫貫於紐以朱爲絃綴於笄之兩旁而屬兩端於武也侯當爲公字之誤也蓋諸公以九爲節每纁九成則九旒旒各九玉公之冕用玉百六十二璿玉石之似玉者三采朱白蒼也德之殺異乎王之全矣其餘延紐皆玄覆朱裏與王同也纁旒皆就者總言侯伯子男之冕也侯伯七命則七就子男五命則五就玉瑱以玉爲瑱所以塞耳也故玉填塞耳以示反聽也前旒蔽明以示其內視也

王之皮弁會五采玉璫象邸玉笄王之弁經弁而加環經諸侯及孤卿大夫之冕韋弁皮弁弁經各以其等爲之而掌其禁令

釋曰皮弁者王視朝之服會縫中也璫結也皮弁之縫中每貫結五采十二以爲飾謂之綦詩云會弁如星又曰其弁伊綦是也象邸以象骨飾弁內項上之祇又貫之以玉笄則爲王之皮弁也璫作綦弁經王弔所服也其弁如爵弁而素所謂素冠也環經大如總之麻經纏而不糾冕吉服韋弁戎服也皮弁朝服也弁經弔服也各以其等各依其

命數也侯伯冕則纁七就用玉九十八子男纁五就用玉五十玉皆三采孤纁四就用玉三十二三命之卿纁三就用玉十八再命之大夫纁再就用玉八藻玉皆朱綠韋弁皮弁則侯伯璫飾七子男璫飾五玉亦三采孤則璫飾四三命之卿璫飾三再命之大夫璫飾二玉亦二采弁經之弁其辟積如冕纁之就禁令者不得相踰僭也是故尊卑貴賤由乎冕弁定等差也卑不可踰於尊賤不可踰於貴弁師掌其禁令則禮行乎九服之諸侯矣此弁師所以在司馬也

司甲 闕其職

王氏曰書之費誓言教乃甲冑敵乃干無敢不
爭而後言備乃弓矢鍛乃戈矛礪乃鋒刃無敢
不善蓋甲冑干所以自保弓矢與矛所以討敵
戎事先自保而後討敵故周官先司甲而後言
也兵

司兵掌五兵五盾各辨其物與其等以待軍事及授
兵從司馬之灋以頒之及其受兵輸亦如之及其用
兵亦如之祭祀授舞者兵大喪獻五兵軍事建車之
五兵會同亦如之 歐虛金反

釋曰五兵戈及戟首矛夷矛此乃車之五兵也五
盾謂貳車之盾乘車之盾旅賁之盾虎士之盾與

藩盾也辨其物者則以其用各有宜也與其等者
則以其制各有長短大小也以待軍事行軍則用
之除戎器戒不虞之意也師旅卒兩之衆合頒干
戈矛戟之屬皆從司馬之灋以頒之也兵輸謂師
旅還有司還兵也用兵謂出給衛守也○甸出革
車一乘凡甲戈楯旗物鼓鐸悉備焉鄉遂之官簡
其兵器是也調發則各以其具行而官府不與知
也司兵司戈盾司弓矢掌授兵器非授之民也授
之鄉大夫從軍會同者也故司兵曰及其受兵亦
如之是鄉大夫畢事則歸之也若民兵則自藏之

民間耳。○東萊呂氏曰古者藏兵於廟大夫家不藏甲凡用兵必取之廟而後授之兵者國之重事出必告於廟歸而必飲至以見其不敢輕舉之意如用兵賞于祖不用命戮于社亦此意如鄭莊公將伐許授兵於大宮此見春秋之初其制尚存舞者兵朱干玉戚之屬車之五兵見上步卒之五兵則無夷矛而有弓矢

司戈盾掌戈盾之物而頒之祭祀授旅賁受故士戈盾授舞者兵亦如之軍旅會同授貳車戈盾建乘車之戈盾授旅賁及虎士戈盾及舍設藩盾行則斂之

釋曰司戈盾者戈所以克敵盾所以衛身戎備之

最急者也頒之謂祭祀軍旅會同之時頒之以給用也故士王族故士也與旅賁當士則衛王也受如杖長尋有四尺貳車副貳之車也乘車王所乘之車也軍旅則革路會同則金路當祭祀之時旅賁夾王車者則使執戈故士從王者則授之戈盾以爲衛有軍旅會同之事副貳之車以戈盾授其僕王所乘之車則建戈盾於其上旅賁虎士趨而衛王故亦授戈盾王所止宿則設盾以爲藩衛王行則無所用故斂而收之

司弓矢掌六弓四弩八矢之灋辨其名物而掌其守藏與其出入中春獻弓弩中秋獻矢箛

藏才浪反中音仲箛音服

釋曰六弓四弩八矢見下文灋曲直長短之數名物六弓八矢等各有名號物色也守則有人藏則有府出則頒之入則受之也中春陽氣方和之時弓弩之所成也故獻之箛盛矢器也以獸皮為之矢與箛成於陰氣方堅之時故中秋獻之蓋四時有明灋萬物有成理先王以道制器固不違乎時之序物之理而與造化同其功矣是以器之成也既完且美而天下之利用於是乎出矣

及其頒之王弓弧弓以授射甲革楛質者夾弓庾弓以授射豸侯鳥獸者唐弓大弓以授學射者使者勞者其矢箛皆從其弓

釋曰王弧夾庾唐大弓體之異名所謂六弓也考工記曰往體寡來體多謂之王弧之屬往體多來體寡謂之夾庾之屬往體來體若一謂之唐大之屬或曰王弧彫弓也唐大彤弓也夾庾盧弓也甲革以革為甲楛質植楛為正射甲與楛試弓習武也王弧弓強故以授之豸侯五十步鳥獸又近而後射夾庾弓弱故授之射侯與戈學射者先用弱

而後習強也唐大強弱適中之弓故以授學射者與為使者與勤勞王事者矢箛從其弓從弓數也每弓一箛一箛百矢

凡弩夾庾利攻守唐大利車戰野戰凡矢枉矢絜矢

利火射用諸守城車戰殺矢鏃矢用諸近射田獵矰

矢第矢用諸戈射恒矢庾矢用諸散射鏃音侯弗音弗庾方二反

釋曰凡弩夾庾利攻守攻城壘者與其自守者相

迫近弱發疾也唐大利車戰野戰連戰進退非強

不及也弩無上弧恒服弦往體少者發矢不疾也

凡八矢者弓弩各有四焉枉殺矰恒弓所用也絜

鏃第庾弩所用也枉矢取變星絜有結約之義五

分二在前三在後其鏃比鏃殺為差小前較重後

微輕其行則疾故利火射用諸守城車戰殺矢前

鐵最重中之必死故曰殺矢鏃矢象焉三分一在

前二在後其前尤重故中深而不可遠用諸近射

田獵為宜結繳於矢謂之矰矰高也第矢象焉第

之言制也七分三在前四在後其鏃比枉絜又差

小其行不低故用諸戈射蓋弋飛鳥刺羅之也恒

矢以其可常用也庾矢象焉以其矢行而卑也八

分四在前四在後訂其行平也故可用諸散射謂

禮射及習射也

天子之弓合九而成規諸侯合七而成規大夫合五

而成規士合三而成規句者謂之弊弓

句音鈞
弊音婢

釋曰規者正圓之器謂之規則圓之至也弓強則

往體寡來體多合多而圓弓弱則往體多來體寡

合少而圓天子之弓王弧也其體不甚曲故合九

而成一規諸侯之弓唐大也其體稍曲故合七弓

而成一規士之弓斗力也故合三弓而成一規句

曲也弊惡也弓以強爲上以弱爲下則直者爲善

而句者爲惡矣故謂之弊弓

凡祭祀共射牲之弓矢澤共射椹質之弓矢大射燕

射共弓矢如數并夾大喪共明弓矢凡師役會同頒

弓弩各以其物從授兵甲之儀田弋充籠箠矢共矰

矢凡亡矢者弗用則更

釋曰祭祀射牲示親殺也殺牲非尊者所親唯射

爲可國語曰禘郊之事天子必親射其牲是已澤

澤宮也所以習射選士之處也質正也樹椹以爲

射正而共其弓矢也如數如當射之數每人一弓

乘矢并夾所以取矢之高者射烏氏用之明弓矢

明器之用器也物弓弩矢箠之屬籠皆所以盛矢

籠以竹爲之，箠以皮爲之。田弋之時，則共矣。而其矢充實於籠箠之中也。矰矢，矢之有繳者，不在籠箠之中也。爲其相繞亂於田弋，則共而已。更謂償也。用於射而亡，則不償。弗用而亡者，則償也。

繕人掌王之用弓弩矢箠。矰弋，挾拾掌。詔王射，贊王弓矢之事。凡乘車充其籠箠，載其弓弩。既射，則斂之。無會計。

釋曰：此繕人所掌王之用弓弩者，謂司弓矢選擇大善者入繕人，以共王之用也。挾挾，矢時所以持弦飾也。著，右手大指。拾，鞬扞着左臂以遂弦，以韋爲之。詔，王射告王所當射之節也。贊，王弓矢之事。授之受之也。乘車，王所乘之車也。充其籠箠，皆以矢實其中也。載其弓弩，載之於車也。行時，備其具以壯武容也。旣射斂之，謂收藏之也。尚文德也。無會計，至尊所用，不可以有司之灋拘之也。

橐人掌受財于職金，以齎其工。弓六物爲三等，弩四物亦如之。矢八物皆三等，箠亦如之。春獻素，秋獻成，書其等以饗工。乘其事，試其弓弩，以上下其食而誅賞。而入功于司弓矢及繕人。

齎音咨

釋曰：財，貨財也。齎，其工者給市財用之直也。皆三

等者弓弩矢箠皆有上中下之制也六物四物八物皆見上稟人掌受財于職金以齎其工而攷其造作之灋也形灋定爲素飾治畢爲成劉氏曰春獻素秋獻成謂弓弩之胎素必備四時之氣而後成也弓人曰凡弓冬折幹而春液角夏治筋秋合三材冬奠體體定則成而可獻矣矢箠亦春作秋成書其工拙之等以試其享食之差乘計也計其事之成功也試考也考其弓弩良否善則上其祿甚則賞之不善則下其祿甚則誅之既考其功乃入之于司弓矢以待頒賜入之于繕人以其王之

用也

凡齎財與其出入皆在稟人以待會而攷之亡其闕之

釋曰所齎工之財及弓弩矢箠出入其簿書稟人藏之以待會而攷之也闕猶除也弓弩矢箠棄亡者除之計今見在者

原曰國家非兵無以衛國兵非器無以利用觀稟人之職工有三等食有上下非直計其事而必試其物非唯饗之以厚薄又臨之以誅賞則造作安敢不慎器用安得不精孔子九經之政亦曰日省

月試旣廩稱事勸百工亦王政之大者考工記弓
人爲弓人爲矢函人爲甲其灋度精審非後世可
及也或曰聖人以道治天下無事於兵今司馬之
兵政於器械之官既有司甲司兵矣又有司戈盾
司弓矢既有繕人掌弓弩矢箠矣又有橐人以乘
事試工豈聖人亦有取勝於天下之心哉曰易之
萃曰君子以除戎器戒不虞除也者治也治其戎
器以戒不虞所以保其萃也聖王能保已之必能
治天下不能必天下之必治故思患預防戎器可
無慎乎故曰兵不完利與空手同甲不堅密與袒

裼同弩不及遠與短兵同射不穿札與亡鏃同苟
有不虞驅空手袒裼之人與戰可乎楚之鐵劍利
而秦王色憂謂劍利則士勇焉耳爲國家者苟不
留聰明有司以常事處之郡國之貢姑備名數武
庫之藏唯謹簿書嗚呼可哉

戎右掌戎車之兵革使詔贊王鼓傳王命于陳中會
同充革車盟則以玉敦辟盟遂役之贊牛耳桃荊使

吏反傳直宣反
敦音對荊音列

釋曰戎車革車也王乘戎車以征伐則戎右驂乘
與君同車執戈盾以備非常并充軍中役使也詔

贊王鼓者兩軍相當王鼓以作士氣既告王當鼓之節又助擊其餘面也軍聲囂雜懼有不聞則大言於陳中以傳王命也會同之際王雖乘金路而革車從行戎右則充革車之左而不敢曠也曲禮曰乘君之乘車不敢曠左是也有盟約之事則以玉敦共軟血辟開也將軟血先執其噐陳載書之辭以開衆心也後之謂持敦血以授當軟者牛耳割以取血又以示順聽尸盟者所執而戎右贊之桃鬼所畏也芻苴帚所以掃不祥盟血在敦以桃芻拂之又助之也

齊右掌祭祀會同賓客前齊車王乘則持馬行則陪

乘凡有牲事則前馬

齊側皆反乘繩證反

釋曰祭祀王乘玉路會同賓客王乘金路前齊車

者王乘車之時則立在馬前以備驚奔曲禮曰君

車將駕則僕執策立於馬前是也王既登車則持

馬以備駭輿之患也既乘而行則陪乘在車右為

驂乘也凡牲事王見牲則拱而式曲禮曰國君式

齊牛齊右則居馬前却行備驚奔也

道右掌前道車王出入則持馬陪乘如齊車之儀自

車上諭命于從車詔王之車儀王式則下前馬王下

則以蓋從

從才用反

釋曰道車象路王所常行大道之車以王燕出入無非道之故也王之出入乘則持馬行則陪乘皆如齊右之儀也王行則以車從王有命焉則道右宣王之命而諭之也詔王之車儀若記曰不廣欬則口之儀也不妄指則手之儀也立視五雉式視馬尾則目之儀也顧不過轂則首之儀也以至升車必正立執綏不內顧不疾言無非車之儀也王式則下前馬與齊右凡有牲事前馬同王下則以蓋從者以儀輔王也

大馭掌馭玉路以祀及犯輶王自左馭馭下祝登受轡犯輶遂驅之及祭酌僕僕左執轡右祭兩軹祭軹乃飲

軹音只軹音范 軹音蒲未反祝之又反

釋曰王出郊以祀則有犯輶之事行山曰輶犯之者封土為山象以菩芻棘栢為神主祭之以車鑠之而夫喻無險難也王自左馭者大馭下而為祝則王當左代之馭也既祭則登受王手之轡犯輶遂驅之謂驅馬登其山而去之所謂犯輶也僕即大馭軹謂轂木軹謂軹前將犯輶之時王以祭餘之酒酌大馭大馭則左并轡以右手酌酒祭左右

兩轂之末又祭軾前執三處乃飲始轆轤而去也
曲禮曰其在車則左執轡右受爵祭左右執范乃
飲是也

凡馭路行以肆夏趨以來薺凡馭路儀以鸞和爲節
釋曰凡馭路揔言馭五路也爾雅曰堂上謂之步
門外謂之趨則馭路之儀其疾徐進止固有節矣
蓋行則欲其舒則歌肆夏以節其行也趨則欲其
齊則歌采薺以節其趨也馭路儀者總言馭五路
之儀也和鸞皆金鈴也鸞在衡而和在軾凡車升
則馬動馬動則鸞鳴鸞鳴則和應節者謂舒疾之
灋也然則王之行趨固有環佩之聲鏘鳴于左左
車之行趨又有和鸞之聲相應于衡軾是以淪清
而聽聰心虛而氣和非僻之心無自而入矣

戎僕掌馭戎車掌王倅車之政正其服犯輶如玉路
之儀凡巡守及兵車之會亦如之掌凡戎車之儀

釋曰戎車革路也王乘以出則戎僕馭馬故曰馭
戎車倅車副車也掌其政令車僕也正其服則正
乘戎車者之服蓋兵事則韋弁服也犯輶如玉路
之儀者王以兵出皆有犯輶之儀田路不言犯輶
則以戎路見之巡守謂巡諸侯之所守兵車之會

謂盟會用兵車二者皆乘革路也戎車之儀戎以威爲主甲冑則有不可犯之色則戎車之儀可知矣

齊僕掌馭金路以賓朝覲宗遇饗食皆乘金路其灋儀各以其等爲車送迎之節

釋曰以賓以待賓客也節謂王乘車送迎賓客各以其爵命尊卑之等而爲遠近之節行人所謂上公九十步子男五十步與司儀所掌有車逆拜辱及出車送之灋儀也

道僕掌馭象路以朝夕燕出入其灋儀如齊車掌馭車之政令

釋曰出入謂旦暮乘象路以之內外朝也燕謂自內外朝乘象路以還燕寢也其灋儀如齊車則其度數動容亦各以其等爲之節也掌馭車之政令以其有故乃攝而代之故道車之副謂之馭車若典命言適子攝其君則下其君之禮六等是也

田僕掌馭田路以田以鄙掌佐車之政設驅逆之車令獲者植旌及獻比禽凡田王提馬而走諸侯晉大夫馳

釋曰木路以田即田路也王旣乘之以適四時之

田又乘之以適縣鄙佐車田車之副也記曰大夫
大殺則止佐車佐車止則百姓田獵則佐車用之於
田獵可知驅逆之車驅謂驅禽使前趨獲逆謂逆
還之使不出圍也令獲者植旌則令獲禽者致於
虞人所植之旌也及獻比禽則比其大小而致之
也凡田總田獵驅馳之灋提猶舉也王提馬首而
走其田路者將以趨其禽而射之也晉進之馳則
亟進之故諸侯則進其車大夫則馳其車皆所以
佐佑翼禽致獲于王也是故提舉行也晉速行也
車馳奔走也尊者安舒卑者速戚

馭夫掌馭貳車從車使車分公馬而駕治之

釋曰自大馭至田僕皆王五路之御者也馭夫則
馭貳車從車使車而已其車既衆非多其員則有
所不給故馭夫共六十人也貳車副車也從車屬
車也使車使者所乘之車也三者皆公車也故分
馬而駕治之駕而調治之者俾閑習齊一安於五
御而去其驚奔也

校人掌王馬之政辨六馬之屬種馬一物戎馬一物
齊馬一物道馬一物田馬一物騶馬一物凡頒良馬
而養乘之乘馬一師四圉三乘爲皐皐一趣馬三皐

為繫繫一馭夫六繫為廐廐一僕夫六廐成校校有左右駑馬三良馬之數麗馬一圉八麗一師八師一

趣馬八趣馬一馭夫

繫音計廐九又反鄭氏曰八宜皆為六字之誤也

釋曰王馬共王五路之馬政謂差擇養乘之灋也

辨六馬之屬者馬之屬不同而所駕亦異天子有

十二閑馬六種故也種馬謂上善似母者玉路用

之物者謂其毛其足其力皆所謂物也辨其物使

之各以類而相從種馬而下以次差之戎路駕戎

馬金路駕齊馬象路駕道馬田路駕田馬駑馬給

宮中之役天子之馬五良而一駑也良馬善馬也

五路之馬也頒之謂頒之于圉師圉人趣馬馭夫

僕夫也養之乘之然後教也四匹曰乘養馬曰圉

圉人良馬匹一人故乘馬四圉圉師教圉人養馬

乘馬則一人故乘馬一師也三乘為阜則馬十二

疋趣馬阜下士一人故阜一趣馬也三阜為繫繫

凡三十六繫一馭夫也馭夫中士也六繫為廐馬

二百一十六匹廐一僕夫則上士也六廐成校變

為言成者明六馬各一廐而王馬之數少備焉故

曰成校校有左右則十二廐為十二閑良馬一種

者四百三十二匹五種合二千五百六十疋駑馬

三之則爲一千二百九十六匹先儒謂乾之策二百一十有六在易乾爲馬故六繫而二百一十六疋爲廐六廐成校合五良一駑凡三千四百五十六疋然後王馬大備矣故校人以中大夫二人爲之也駑馬三良馬之數者二馬爲麗麗耦也麗馬一圉六麗則十二疋六師則七十二疋六趣馬則四百三十二疋以三計之則千二百九十六疋與三良馬之數等也王氏曰夫駑馬一物而必三良馬之數者以馬材之不良者充役事爲多故也因其數之多寡設官以掌之亦有小大之序故良馬自圉師至校人則以中大夫爲之其官則爲稱尊駑馬自圉師至馭夫而止者以其材下於良馬故掌養乘之者兼其數而掌其事官至於中士之馭夫而已

天子有十二閑馬六種邦國六閑馬四種家四閑馬二種凡馬特居四之一春祭馬祖執駒夏祭先牧頒馬攻特秋祭馬社臧僕冬祭馬步獻馬講馭夫

釋曰閑必以木爲之以防馬也六廐成校校有左右故十二閑也馬六種則種戎齊道田駑也邦國六閑良馬三閑駑馬三閑馬四種則無種馬戎馬

也。卿大夫良馬一閑，駑馬三閑，馬二種，止有田馬。駑馬而已。特，牡特也。詩曰：實維我特。特居四之一，是三牝一牡，欲其生之衆也。馬祖天駟星也。房星爲天駟，馬資之以生，故祭馬祖。執猶拘也。春通淫之時，駒馬之未壯者，血氣未定，不可通淫，故執之。先牧始養馬者，馬火畜，火夏盛，駒之蹄齧不可乘。用故因夏頒馬而牧，鑿其蹄也。馬社，廐中土神。凡馬日中而出，日中而入。秋馬入廐之時也。故祭馬社，臧僕則簡練馭者，令皆善也。馬步神之能爲災害馬者，故祭之以禳災。獻馬，獻成馬於王也。講馭

夫五馭之灋，講習其藝也。

凡大祭祀，朝覲會同，毛馬而頒之，飾幣馬，執扑而從之。凡賓客受其幣，馬犬喪，飾遣車之馬，及堊埋之田獵，則帥驅逆之車。凡將事于四海山川，則飾黃駒。凡國之使者，共其幣馬。凡軍事物馬而頒之，等馭夫之祿。宮中之稍食。扑，音卜反。

釋曰：毛馬，齊其色也。頒授當乘者，爾雅言宗廟齊毫尚純也。而此於宗廟會同，亦毛馬者，承賓如敬神也。天子之於諸侯，有馬爲禮而賜之者，謂之幣馬。校人主飾之士喪禮曰馭者，執策立于馬後所。

謂執朴而從之，所以防其奔逸也。賓客之聘，馬諸侯來朝聘而享王者，校人受其庭實之馬。右者以塗爲車，以芻爲人馬，亦校人飾之，以類也。及堊埋之，則明噐也。驅逆之車，田僕設之，校人帥之也。王巡狩過大山川，則用黃駒爲牲，以析沉，校人飾之。黃者地之中色，駒者行地無疆地之類也。猶郊用犢之意，天子使人於侯國，或以幣馬賜諸侯，或以私覲皆共之也。軍事物馬齊其力也。爾雅曰：戎事齊力尚強也。田事齊足尚疾也。頒之，頒官府卿大夫共軍者等馭夫之祿者，校人之屬自趣馬至圉師皆有祿食，舉馭夫以見之也。稍食餼廩也。謂養馬於宮苑之中者，亦校人等其祿廩也。

呂氏曰：三代之制，天子萬乘，諸侯千乘，大夫百乘，立國制賦之灋，莫不以馬爲本。所以乘馬之灋，在古最爲精密。然天子諸侯大夫乘馬之數，多寡不同。細攷當時之馬，有養之於官者，有藏之於民者。如丘甸歲取馬一匹，皆藏之於民，不仰公家芻秣。如有事田獵，臨時徵召，然而在天子之都，諸侯之國，大夫之家，未嘗不自畜馬。此是養之於官者，天子十二閑數，不過三千。衛文公承新造之國，末年

亦至駮駝三千當殘亂之餘如何便及成周全盛
 乘馬之數蓋十二閑亦養之於官者所謂三千亦
 舉通數言之又如鄭子國之難子產以車十七乘
 出討賊子產百乘之家耳如徵馬於郊野之間盜
 賊卒至何以得集是十七乘乃養之於家者則三
 代之馬固有在官者亦有在民者數之多者在民
 平時無芻秣之費數之少者在官征伐無不至之
 虞占之制度精密如此

趣馬掌贊正良馬而齊其飲食簡其六節掌駕說之
 頒辨四時之居治以聽馭夫

說始銳反
治直吏反

釋曰馬三乘為阜而下士一人為之趣馬校人既
 物而乘之以為良矣又從而贊正其有弗良也將
 駕五路謹擇之至矣齊其飲食欲其力之均也簡
 差也節猶量也差擇王馬以為六等駕以行說以
 止有勞逸之節故以叙而頒之也居謂牧廐所處
 之宜治謂執駒攻特之屬以聽馭夫則惟馭夫之
 所役使也

巫馬掌養疾馬而乘治之相醫而藥攻馬疾受財于

校人馬死則使其賈粥之入其布於校人

賈音古
粥音育

釋曰乘治謂驅步以發其疾知其所疾之處而後

可驗而療之若獸醫所謂觀其所發而養之是已
相醫而藥者蓋其屬有醫四人其治疾則亦以藥
攻焉然醫馬疾大抵以獸醫為主巫馬之用藥亦
以相醫而已攻馬疾攻謂繫而治之也蓋其疾有
藥不足以療之者乃用攻焉猶瘍醫所謂以毒藥
攻之也受財于校人者以資醫馬之費也馬死則
以其賈粥之以其屬有賈二人以知其直也入其
布于校人所粥死馬之布泉也

牧師掌牧地皆有厲禁而頒之孟春焚牧中春通淫
掌其政令凡田事贊焚萊

釋曰牧地非一處度其年歲水草之宜與其馬之
衆寡而頒之授圉者所牧之處也厲禁者謂可牧
馬之處亦使其地之民遮護禁止不使人輒牧牛
馬也孟春焚牧地以陳生新草也中春通淫除陽
交萬物生之時可以合馬之牝牡也田事焚萊者
山澤之虞牧師贊之所以護牧地弗盡之焚也
廋人掌十有二閑之政教以阜馬佚特教駢攻駒及
祭馬祖祭閑之先牧及執駒散馬耳圉馬正校人員
選馬八尺以上爲龍七尺以上爲駉六尺以上爲馬
釋曰天子之馬十有二閑政以正之教以道之也

阜盛壯也，佚特者乘用有節，不使甚勞，安其血氣也。三歲曰駘，教駘者始乘習之也。二歲曰駒，攻駒者治其蹄齧也。閑之先牧，始制閑者，非前養馬之先牧散馬耳。以竹括押其耳頭，毋令善驚也。圉馬，教圉其馬也。校人，謂師圉也。正員，選者選擇可備校人之員者。平之，其員不應選者，正之也。馬八尺極高大者，可備天子五路之駕，故曰龍。月令曰：駕蒼龍七尺以上，諸侯之上駟，故稱駮。六尺，特常馬耳。故但稱馬也。

圉師掌教圉人養馬。春除葶，釁廐，始牧夏房馬。冬獻

馬射，則充椹質。茨墻則翦闔。

葶音辱，房五嫁反。茨在私反。闔戶臘反。

釋曰：以師名官者，掌教圉人養馬也。冬寒，藉馬以葶。春則除之，釁廐，殺牲釁之，辟去邪氣也。始牧者，春秋傳曰：馬日中而出，日中而入，日中謂春分秋分也。故春始牧，房廐也。廐，所庇馬涼也。夏熱，故也。椹質，以木為之，縛草以代侯也。茨，蓋也。闔，苫也。翦草以苫蓋也。椹質，翦闔，皆圉師所習也。故因而使之。車乘，通王制之，服之也。大，百四也。圉師，掌教圉人之事，乘通王制之，服之也。大，百四也。圉師，掌教圉人之事，乘通王制之，服之也。

圉人掌養馬芻牧之事，以役圉師。凡賓客喪紀，牽馬而入陳，獻馬亦如之。

釋曰芻以飼馬牧以放馬皆所以養之也役圉師受教於圉師聽使令也賓客之馬詩曰雖無予之路車乘馬王所以賜之也大司馬喪祭奉詔馬牲則喪紀之馬遣車所用也牽馬入陳者賓客則陳之於館喪紀則陳之於廟也廡馬遣車之馬也圉人賤役者也

何氏曰馬政之用古今一也而古之牧者在民今之牧者在官以其在民也故牧養之灋不可得而詳以其在官也故牧養之灋不可不講成周之制官有馬質下士爲之而賈二人以平馬價則是當

時公私皆有馬矣然校人之職掌王馬之政自乘至廡爲匹二百六十有奇五分其良而駑居其一焉凡五良而一駑則總爲馬二千六百此其大數也王馬之政牧養之灋莫詳於此又以井田之灋計之甸六十四井也其賦兵車一乘戎馬四匹又以六鄉六遂之民而實計之十有九萬家則王之馬不能加其二分之一至於徒役之興戰陳之事則王命校人掌物其馬而次之則馬不專賦於民矣又以大司馬之灋而計之則天子提封萬井兵車萬乘戎馬四萬匹則是所賦之馬多於王數十

倍而當時不有牧養之灋爲其在民者多也漢有牧師諸苑三十六所畜馬三十萬匹用官奴三萬人散在北邊則牧之以民又有牧之之地唐初得隋馬三千匹八坊四十八監而張萬歲掌之其後萬歲失職馬亦減少至王毛仲領群牧而有四十三萬唐之諸監或在隴右或在河西馬之蕃耗皆係乎監牧之人而又有牧之之地則其在官也多矣

職方氏掌天下之圖以掌天下之地辨其邦國都鄙四夷八蠻七閩九貉五戎六狄之人民與其財用九

穀六畜之數要周知其利害

貉孟白反

釋曰圖如今之輿地圖也大司空掌天下九州土地之圖特圖而已職方掌天下之圖以掌天下之地則據圖以掌天下之地也邦國諸侯之國也都鄙邦國之采邑也東方有四夷南方有八蠻東方有七閩西方有九貉西北有五戎北方有六狄其疆理廣道里遠孰從而辨之按圖而辨之也邦國都鄙在九州之內夷蠻閩貉戎狄在九州之外雖有內外之殊然先王之政一視而同仁其財用之所出九穀六畜之所產其數要不可以不辨也其

利害不可以不知也數謂別而計之要則總而計之也利如金石粟帛之類凡可以利人者也害謂猛獸長蛇之屬凡可以害人者周知其利害則將以興其利而除其害也

乃辨九州之國使同貫利東南曰揚州其山鎮曰會稽其澤藪曰具區其川三江其浸五湖其利金錫竹箭其民二男五女其畜宜鳥獸其穀宜稻

會古外反藪素口反

釋曰事之有條謂之貫可以生養火者謂之利四方九州之人民好惡之不同財用有無之不等必周知其利害貫而通之使有無之相濟善惡之相

易也一天下之財用養天下之人民俾同享其利焉其山曰鎮者能出雲雨以生萬物鎮安於一州水瀦而不流以生蒲魚者曰澤水涸而不耕而生草木者曰藪水流而趨海者曰川水積而成淵者曰浸其民資之以爲生者曰利其衆待之以爲養者曰畜其土宜之以爲食者曰穀八者九州之民仰之以爲生者也九州之邦國仰之以爲富者也苟周不知其數要則天下之民不可得而同貫其利矣○自此以下陳九州之事先從南方蓋尊於陽方也四鎮五嶽總言之皆山鎮也會稽在山陰

具區吳越之間今吳縣南太湖即震澤也三江謂
婁江東江松江也禹貢曰三江既入是也五湖即
太湖也王氏曰國語伍子胥曰吳與越三江環之
范蠡曰與我爭三江五湖之利者非吳耶然則三
江五湖乃吳越之境內也春秋越與吳戰于五湖
注今太湖也然則太湖即五湖耳非太湖之外又
有四也○禹貢惟金三品璣琨篠簜則金錫竹箭
固揚州產也二男五女蓋通以一州之人民計之
七人之中二爲男五爲女也八州言男女者義同
飛曰鳥走曰獸稻稌也即南方水生之秔稻也

正南曰荊州其山鎮曰衡山其澤藪曰雲夢其川江
漢其浸潁湛其利丹銀齒革其民一男二女其畜宜
鳥獸其穀宜稻夢亡貢反
湛直減反

釋曰禹貢荊及衡陽惟荊州衡山南嶽也在湘南
雲夢一澤名在華容安陸然楚之雲夢澤跨江南
非止此也江出岷山漢出嶓冢即禹貢所謂荊州
江漢朝宗于海詩所謂滔滔江漢南國之紀是已
潁水出陽城湛未詳禹貢荊之厥貢羽毛齒革惟
金三品與夫礪砥磬丹則丹銀齒革固荊州所產
也

河南曰豫州其山鎮曰華山其澤藪曰圃田其川滎
雒其浸波澆其利林漆絲枲其民二男三女其畜宜

六擾其穀宜五種

華如字圃布古反滎戶扁反
澆音詐枲思似反擾而小反

釋曰禹貢荆河惟豫州伊洛瀍澗既入于河滎波

既豬華山西嶽也在華陰圃田在中牟縣滎水出

東垣入于河在滎陽雒在雒邑爾雅曰水自洛出

為波澆未詳所在春秋傳楚子梁澆營軍臨隨則

在漢南宜屬荊州在此非也林竹木也禹貢豫之

厥貢漆絲締紵貝林漆絲枲固豫州所產也六擾

馬牛羊犬豕鷄也以其人所擾馴畜養故曰六擾

五種黍稷菽麥稻也

正東曰青州其山鎮曰沂山其澤藪曰望豬其川淮

泗其浸沂沐其利蒲魚其民二男二女其畜宜鷄狗

其穀宜稻麥

沂魚祈反沐
音述或為洙

釋曰禹貢海岱及淮惟徐州蓋周公以徐為青州

故也沂山沂水所出也在蓋縣望豬即孟豬也在

睢陽淮水出桐柏今淮河也泗出魯國今泗州也

沐出東莞屬瑯琊禹貢曰淮沂其又是也蒲水草

其地水多故產蒲魚禹貢泗濱浮磬淮夷蠙珠暨

魚

河東曰兗州其山鎮曰岱山其澤藪曰大野其川河
沛其浸盧維其利蒲魚其民二男三女其畜宜六擾
其穀宜四種沛子禮反盧維音雷雍

釋曰禹貢曰濟河惟兗州九河既道雷夏既澤雍
沮會同岱山東岳也今之泰山大野在鉅野縣或
曰即今之南望湖也河謂大河沛即濟水盧當作
雷即雷夏也維當為雍即雍水也四種黍稷稻麥
也

正西曰雍州其山鎮曰嶽山其澤藪曰弦蒲其川涇
汭其浸渭洛其利玉石其民三男二女其畜宜牛馬

其穀宜黍稷

雍於用反汭如鏡反

釋曰禹貢黑水西河惟雍州嶽西嶽也爾雅曰河
西嶽弦蒲在涇涇出涇陽汭在函地公劉曰汭鞠
之即渭出鳥鼠同穴洛出熊耳汭隴之西多出美
玉美石琅玕之類禹貢曰厥貢惟球琳琅玕

東北曰幽州其山鎮曰醫無閭其澤藪曰貍養其川
河沛其浸菑時其利魚鹽其民一男三女其畜宜四
擾其穀宜三種貍音考

釋曰爾雅曰燕曰幽州東方之美有醫無閭之珣
玕琪焉醫無閭在遼東貍養在長廣今萊陽縣有

獫狁養津菑出萊蕪時出般陽賈氏曰幽州之河洿
 亦與兗同者蓋兗在河東北二州相連皆有河洿
 也蓋禹貢又北播為九河同為逆河入于海道沈
 水東流為濟則幽兗皆河濟所經之地也魚鹽近
 海故也天官有鹽人所掌者共膳夫王宮之用而
 已此曰其利魚鹽禹貢曰厥貢鹽絺則鹽在古無
 禁後世有鹽禁非也四擾馬牛羊豕也三種黍稷
 稻也

河內曰冀州其山鎮曰霍山其澤藪曰楊紆其川漳
 其浸汾潞其利松柏其民五男三女其畜宜牛羊其

穀宜黍稷

紆於于反汾伏
夕反潞音路

釋曰冀州在河北東西南三面距河故曰河內霍
 山在蔬陽爾雅曰霍山之多珠玉今霍州楊紆水
 詳爾雅曰秦有陽跨漳水出長子縣禹貢曰覃懷
 底績至於衡漳汾出汾陽詩云彼汾一曲潞出歸
 德晉地多山松柏所產柳子晉問所言是也其地
 男多女少

正北曰并州其山鎮曰恒山其澤藪曰昭餘祁其川
 虜池嘔夷其浸涑易其利布帛其民二男三女其畜
 宜五擾其穀宜五種

恒音常虜音呼池
徒多反嘔烏侯反

釋曰恒山北岳也爾雅曰燕有昭餘祁在鄔虜地出鹵城嘔夷出平舒涑出廣昌易出固安五擾牛羊豕犬馬也○薛氏曰凡九州之土高者宜黍稷下者宜稻麥山氣多男澤氣多女東南多絲縷西北多織皮先王之於民因其東西南北之異方山澤川浸之異宜男女異數玉石異產黍稷稻粱之異種丹漆絲枲之異利廣谷異制民生異俗為之脩其教而不易其俗齊其政而不易其宜山者不使居川澤者不使居中原駢剛之地糞種不以羊赤緹之地糞種不以牛然後五方之民各安其性樂其業而無偏弊之患矣

葉氏曰古之言九州者三禹貢之冀兗青徐揚荆豫梁雍夏制也爾雅之冀幽營兗徐揚荆豫雍先儒以為商制也職方之揚荆豫青兗雍幽冀并周制也商有幽營而無禹貢之青梁周有幽并而無禹貢之徐梁此三代之九州不同也爾雅有九州之名無九州之界禹貢職方之界有相侵者言之職方冀州視禹貢為小以分冀為幽并如舜時制是一分而為三也雖無徐州而青兗之間是已雖無梁州而雍豫之間是已禹貢曰海岱及淮惟徐

州又曰大野既豬今職方青州之川淮泗兖州之澤大野是以徐而入青兖可知矣禹貢曰華陽黑水惟梁州又曰厥貢璆鐵銀鏤砮磬今職方豫州之山華山雍州之利玉石是以梁而入雍豫可知矣職方既以青兖而包徐故青州多入禹貢之豫兖州多入禹貢之青禹貢豫州曰被孟豬而職方青州曰其澤望豬豈非青之入豫乎禹貢青州曰鹽絺海物而職方兖州曰其利蒲魚豈非兖之入青乎職方既分冀而爲幽并故幽州多入禹貢之青徐冀州多入禹貢之雍職方曰幽州其山醫無

閭醫無閭在遼東漢光以遼東屬青州後又屬幽州茲非幽之入青乎職方曰幽州其澤獯養其浸菑時獯養在長廣菑出萊蕪地理志以長廣屬徐州瑯琊自萊山茲非幽之入徐乎職方曰冀州其澤楊紆爾雅謂秦有楊紆李巡以爲在扶風茲非冀之入雍乎大抵周以禹之一冀州分而爲三以禹之八州合而爲六其勢必不能如禹之舊也乃辨九服之邦國方千里曰王畿其外方五百里曰侯服又其外方五百里曰甸服又其外方五百里曰男服又其外方五百里曰采服又其外方五百里曰

衛服又其外方五百里曰蠻服又其外方五百里曰夷服又其外方五百里曰鎮服又其外方五百里曰藩服

釋曰即大司馬之九畿也以其服事天子故曰九服詩曰侯服于周王畿司馬曰國畿藩作蕃○丘氏曰衛服之外聖人雖制服之不必其來故武成叙諸侯之助祭洛誥稱諸侯之和會康王之誥陳諸侯之聽命止言五服而已

夾漈鄭氏曰禹貢有五服各五百里是禹之時地方五千里職方有九服亦各五百里并王畿千里

則周之時地方萬里矣五服九服之制雖若不同詳考制度無不相合禹之五服各五百里自其一面數之職方九服各五百里自其兩面而數之周之王畿即禹之甸服各方千里禹貢之甸服五百里据一面而數之周畿千里不在九服之內至畿之外定制為九服各五百里以兩面相方而數之大抵周之王畿即禹之甸服周之侯甸即禹之侯服周之男采即禹之綏服周之衛蠻即禹之要服周之鎮夷即禹之荒服大率二畿當一服而周人鎮服之外又有五百里之藩服去王城二千五

百里乃九州之外地增於禹貢五百里而已故行人之職其言九州之外謂之藩服則九州之外又有五百里之藩服明矣禹貢既叙五服又曰東漸于海西被于流沙朔南暨聲教訖于四海是九州之外地也又如益稷曰弼成五服至于五千州十有二師外薄四海咸建五長謂四海之外各建諸侯爲之長豈非周之藩服乎詳考制度無不相合求之里數未始不同先儒有禹弼萬里之說周斥大封疆之說皆考古未精耳

凡邦國千里封公以方五百里則四公方四百里

六侯方三百里則七伯方二百里則二十五子方百

里則百男以周知天下

七伯當作十一伯

釋曰一州之地方千里以封國必大小相維今舉

封國之大數言之以千里爲限則有四公六侯十

一伯二十五子百男之差所以表其千里也其實

公侯伯子男之數封之以是爲準故曰以周知天

下

薛氏曰邦國有正封之地有廣封之地公侯方百里伯七十里子男五十里此正封也諸公之地封疆方五百里侯四百里伯三百里子二百里男百

里此廣封也職方兼屬國附庸之地而言之廣封者然以邦國千里計之方四百里則六侯餘四百里三百里則十一伯餘百里何也蓋地勢不能常如碁局之方特因侯伯之爵以里數封之而已餘里無所餘焉職方舉其大數然也周制天下之地凡五千五百里一千爲王畿一千五百里爲夷鎮藩之服封諸侯之地則三千里而已今此封公侯伯子男之地各千里合而數之則六千里何也蓋職方氏特以封疆之數言之非有地里如此之廣也

凡邦國小大相維王設其牧制其職各以其所能制其貢各以其所有

釋曰小大相維謂五國爲屬屬有長二十五國爲連連有率二十國爲州州有正二百一十國王設八命之牧統臨而牧理之八牧屬於天子之老二曰二伯制其職牧監參伍各因其材不強其不能也制其貢任土作貢各隨其所產不責其所無也

陳氏曰三代時牧守更代諸侯世襲權皆出於上如周初時荊州之牧則蔡叔其後則申侯豫州之

牧則管叔其後則虢公周公君陳畢公迭居東郊
初周公爲東伯周公既沒君陳不爲東伯行東伯
之事至康王命畢公曰今予祇命公以周公之事
成王崩時畢公率東方諸侯則是已爲東伯矣宣
王中興只理會牧伯而已故韓侯在韓召虎在淮
申伯在荆方叔在齊漢諸侯王自景武後若寄君
然已不足言至唐藩鎮則是舉五侯九伯女實征
之之事而付之世襲之人者則其弊有不勝言者
王將巡狩則戒于四方曰各脩平乃守攻乃職事無
敢不敬戒國有大刑及王之所行先道帥其屬而巡
戒令王殷國亦如之

釋曰王將巡守則諸侯各朝于方岳之下故職方
氏前期警戒四方諸侯也守謂國境之內脩之平
之使各當其分也諸侯所務之職事則攷察之不
使有曠職廢事也國有大刑謂討伐諸侯王之所
行謂巡守所行之處先道先由王所從道居前行
帥其屬土方氏以下而巡行前日所施戒令也十
二歲不巡守六服盡朝謂之殷國殷猶衆也其戒
四方諸侯與巡守同
陳氏曰自古封建之灋天下至廣難以統一故五

載一巡守以一風俗以通民情至周而五載巡守
既不能行故置職方擇人訓方氏之官以通達上
下使無壅蔽逮漢或遣謁者循行天下是亦得周
公之遺意也自元封五年初置刺史每以秋分行
部以詔書六條察郡國舉不瀆而後天下民情利
害其雍遏通達皆係于刺史之手而上或不得以
聞宣元以後稍還古意天子則有郎官之出宰相
則有掾史之行上下相察莫之或匿如魏相敕掾
吏案事郡國輒白四方異聞或有逆賊風雨災異
郡不上達相輒奏言之是郡國欲隱之宰相而不

知掾吏已得以上達民情既通上下不壅則治可
爲也

土方氏掌土圭之灋以致日景以土地相宅而建邦
國都鄙以辨土宜土化之灋而授任地者王巡守則
樹王舍

相息亮反

釋曰土方氏掌邦國土地之事領司空土圭土宜
土化之灋以施邦國之政者也故土圭長尺五寸
致日景者立八尺之表夏至則景尺五寸冬至則
景丈五尺土地猶度地也以此土圭度地勢而相
其可居者以建諸侯之邦國公卿之都鄙也土宜

謂九穀所宜土化謂糞種所用授任地者謂授諸侯任地之官與草人而令其耕種也樹王舍若掌舍設榷桓之時則於外周匝而樹爲藩籬也

王氏曰大司空凡建邦國以土圭土其地而土方氏掌土圭之灋以土地相宅而建邦國都鄙則輔相司空建國之事而已大司空掌土宜之灋而土方氏亦以土宜土化之灋而授任地者則輔相司空草人任土糞種之事而已司空草人所掌止於王畿而土方氏所掌則主於四方邦國故名官以土方氏焉

懷方氏掌來遠方之民致方貢致遠物而送迎之達之以節治其委積館舍飲食

釋曰遠方之民四夷之民也諭德延譽以來之非誘而致之也方貢遠方所貢之物若西旅底貢厥獒是也致遠物則致遠方所獻之物若所謂無有遠邇畢獻方物是也遠方之有貢猶六服之貢則世一見各以其所貢之寶爲贄是也遠方有所獻之物猶六服諸侯之獻國珍是也送迎之送往迎來以爲之禮也達之以節達民以旌節達貢物以璽節也治其委積所以備其用也治其館舍所以

安其居也治其飲食所以順其嗜好也達之以節使無留難治其委積館舍飲食使有所資賴此所以懷之也各官謂之懷方其以此歟

劉氏曰遠人不服則脩文德以來之是懷萬方以成蓼蕭之化者聖王之事也遠人既來則懷方氏掌其送迎道路之給而開之以道德仁義之化悅之以聖人中和禮樂之方陳之以位天地和陰陽之本感之以致神祇遂生育之義使之心懷而誠服踴躍於內向而不知其已也

合方氏掌達天下之道路通其財利同其數器壹其

度量除其怨惡同其好善

好去聲

釋曰達天下之道路津梁相湊往來相通不至阻絕也通其財利使懋遷有無豐凶相易以相濟也同其數器儀等一定權衡同律無異同也一其度量使丈尺釜鍾不得有大小也除其怨惡則講信脩睦不相侵伐也同其好善則脩仁尚義一道德同風俗也

原曰先王立合方氏之官見王者大一統之治也事相通而不壅政齊一而不貳教道行而好尚正則一統之治見矣是故道路財利通此合方之事

也未及乎政焉同數噐而九儀之命皆有定守一
度量而五則之制亦有定用此合方之政也未及
夫教焉至於除其怨惡同其好善則講信脩睦敦
仁尚義明禮興樂無有異志合方之爲教大矣
訓方氏掌道四方之政事與其上下之志誦四方之
傳道正歲則布而訓四方而觀新物

釋曰道猶言也四方諸侯也大之爲政小之爲事
志其所向之善惡也皆言之於王傳道民臣所傳
說邪正利病之事及傳聞四方諸侯之事必爲王
誦之蓋天子耳目之官也正歲十一月歲首則布

其所傳道之善惡而訓之使去惡而從善也觀察
也察其風俗之變也故觀其新物以審民之好惡
則移風易俗之政必有所始者矣其佳惡各言於
原曰訓方者所以訓誨天下之諸侯也然誨之必
有所因故先以列國之政事孰爲崇讓孰爲尚功
又以列國君臣之志孰爲好賢孰爲忠諫又考之
臣民朝野之所傳說詳以告王則王之四日以明
四聰以達矣王乃以其所誦所傳所道者施爲繩
愆糾繆之教使訓方氏正歲布而訓于四方所以
正一歲之始也又觀其新物以察其能改革舊染

汙俗維新與否三年則黜陟賞罰行焉如是則四方之遠所聞者無非灋言所行者無非灋行道德由之而一風俗由之而同矣夫先王之所以致天下之大順而以中國為一天者以有此具也孰謂其官微而不足以寓大政耶賈疏為也則又言之

形方氏掌制邦國之地域而正其封疆無有華離之使地小國事大國大國比小國華讀為瓜若蛙反

釋曰大司空建國自諸公至子男其封疆各有多寡之數形方氏掌其地域正其封疆所以奉行大司空之灋也析而不絕為華絕而不續為離正其

封疆使無有華離之地則小國易以守大國難以侵人各有其土宇而無交爭矣小國子男也大國公侯也凡建國必大小相維錯雜而處各相統屬故建牧立監以安之形方氏又使小國不得越分僭慢而謹事大國大國亦包涵偏覆不驕不凌而比小國則天下和平萬國以貞矣

劉氏曰大司馬建邦國之九灋有均守平則以安邦國之灋則形方氏正其封疆不使相侵而無有孤離是也有比小事大以和邦國之灋則形方氏小國事大國大國比小國是也大國不比於小國

則侵其封疆而有瓜離矣正之弗從然後詔於大司馬而九伐行焉聖人之於刑伐必有其漸不得已而後行以有形方氏爲之始也

山師掌山林之名辨其物與其利害而頒之于邦國使致其珍異之物

釋曰山林在諸侯之國者名與物若岱畎絲枲暵陽孤桐是也利謂物之可充民用者害謂物之能爲人害者頒其名數于邦國使之各致其所產珍異之物令充貢獻以供王之珍玩膳羞服用也

師掌川澤之名辨其物與其利害而頒之于邦國

使致其珍異之物

釋曰川澤亦在諸侯之國者川之所產有魚鱉屬澤之所產有麋鹿之屬珍異之物如泗濱浮磬淮夷蠙珠暨魚之類

邊師掌四方之地名辨其丘陵墳衍邊隰之名物之

可以封邑者

邊與原同

釋曰地名如冀之大陸徐之東原之屬辨其名以知其平陂燥濕辨其物以知其肥磽美惡物之謂相其地可以居民立邑○大司空辨山林川澤丘陵墳衍原隰之名物而辨其邦國都鄙之數邊師

之所掌皆所以行大司空之灋者也除山林川澤
四者有官餘丘陵墳衍原隰皆原師掌之
原曰山林川澤皆有虞衡又設山川邊師於夏官
以在邦國之山林川澤也故邦國各有虞衡矣使
不立三師以掌之則珍異之物何由而致而疆界
必孤離於列國爭訟由之以起矣後人析入他官
不亦繆哉

國人掌達灋則匡邦國而觀其慝使無敢反側以聽
王命

釋曰灋則八灋八則也邦國之官府都鄙亦用焉

慝姦偽之惡也反側背違反覆也匡人推達灋則
以正列國諸侯而察隱慝使之無敢貳心忠誠一
德以尊天子如是則無從匪彛無隳王度一唯王
命是聽庶不陷於九伐矣

擇人掌誦王志道國之政事以巡天下之邦國而語
之使萬民和說而正王面

語魚據反擇與探同

釋曰志者心之所之政事者心之所發巡行天下
邦國以王所欲致治之志慮與王所行之政事以
告語諸侯則可以宣德意感人心則天下之民莫
不和悅而正向於王矣

原曰先王之於諸侯雖分之以土然所以防閑感化之者亦至矣既有合方氏以一其統馭又有訓方氏以明其好惡則其所以教之者亦至矣此又設匡人使察其有二心不忠反側者惡雖未形見於外其所以匡救之者預矣又立撻人之職以王之志慮與王之行事告之使其傾心一意以向於王夫遠則心貳驕則犯上勢所必有也王者於諸侯所以訓誨防閑之者如此之密則蓼蕭之嘉禾天保之至誠不有所自來耶

都司馬掌都之士庶子及其衆庶車馬兵甲之戒令以國灋掌其政學以聽國司馬家司馬亦如之

釋曰都謂王子公卿之采邑邦國有司馬都亦有

司馬掌士庶子者司馬司軍賦士庶子主宿衛軍

賦者衆庶則民之籍於司馬者也車馬者則所謂

甸出車一乘是也掌其政學亦猶諸子之春合諸

學秋合諸射以攷其藝而進退是也國司馬則邦

國之司馬蓋都亦邦國之都也如王畿之都則聽

於大司馬矣劉氏曰采地之卿大夫仕於王朝士

庶子在外既不屬於宮伯諸子及有軍旅之事徵

兵於都鄙則以士庶子作其衆庶車馬兵甲而都

司馬掌其戒令以聽國司馬奉其節制以進退討
伐焉都司馬掌大都小都之士庶子者也家司馬
掌家邑皆如都司馬之事但大小不同耳

原曰都家者天子公卿大夫之采地各置司馬平
時糾戒率令之使興事體教無有違慢則都家之
君雖有數百乘之富無不統馭於王朝矣又其士
庶子都家司馬掌其政學一如王國教胄之灋然
後世祿之人無驕汰敗禮矣如有軍旅之事徵兵
于都鄙則都家司馬率之而聽于國司馬朝大夫
云治有不及在軍旅則誅其有司此聖王馭都家
之灋所以必使都鄙之君無不循灋守則而成太
和之治也豈有後世據邑要君之事哉

周禮全經卷之十

周禮全經卷之十

後學柯尚遷釋原

秋官司寇第五

秋肅殺萬物刑所以懲奸惡而整齊萬民也故立司寇掌邦刑以象秋故謂之秋官群行政劫曰寇舜命臯陶作士命之曰蠻夷猾夏寇賊奸宄則刑以懲寇爲急也天下之亂有不始於群行政劫乎故名官曰司寇官所司而至於寇則刑罰之事無不舉矣

惟王建國辨方正位體國經野設官分職以爲民極

乃立秋官司寇使帥其屬而掌邦禁以佐王刑邦國
釋曰禁所以防奸刑所以懲惡司寇司刑不言刑
而言禁者刑施於已然禁防於未然先王設刑惟
恐人入於其中故爲之明示法禁使知有如是之
罪必陷如是之刑則人有懼心易避而難犯故言
邦禁也司徒曰以刑教中則民不覿司寇掌邦禁
又曰刑邦國者蓋刑以弼教寇則敗其教之成者
也縱欲敗類乃教之所棄而刑之所取王氏曰禁
之所以爲仁刑之所以爲義禁之不止猶有犯焉
然後以義斷仁也

刑官之屬大司寇卿一人小司寇中大夫二人士師
下大夫四人鄉士上士八人中士十有六人旅下士
三十有二人府六人史十有二人胥十有二人徒百
有二十人

釋曰大小司寇爲刑官士師至旅下士爲屬六十
舜命臯陶曰汝作士穆王訓刑曰士制百姓于刑
之中則古之刑官其名爲士至成周始以士爲司
寇春秋時陳以避諱之故又改爲司敗其名雖殊
掌刑則一故其屬之首必名爲士師鄉士者掌國
中之刑罰猶鄉遂師也

遂士中士十有二人府六人史十有二人胥十有二人徒百有二十人

釋曰遂士掌六遂之刑獄者也每遂二人故總之十有二人也

縣士中士三十有二人府八人史十有六人胥十有六人徒百有六十人

釋曰縣士掌四等公邑之刑獄者也

方士中士十有六人府八人史十有六人胥十有六人徒百有六十人

釋曰主都家之刑獄者采地在王畿四方故曰方

士

訝士中士八人府四人史八人胥八人徒八十人

釋曰訝迎也士官之迎四方賓客以獄訟爲主故曰士云

朝士中士六人府三人史六人胥六人徒六十人

釋曰朝士掌外朝之灋爲大詢衆庶主聽獄之朝故屬秋官

司民中士六人府三人史六人胥三人徒三十人

釋曰此官主民數者非訟獄者而屬秋官何也書其生齒登下之數欲生齒日多也生日多則刑日

少矣故刑期無刑雖設而民不犯此聖人之意故雖殺民將以生之也此司民所以在司寇與

司刑中士二人府一人史二人胥二人徒二十人

釋曰此官掌五刑之灋以詔司寇弊獄者

司刺上士二人府一人史二人徒四人

釋曰刺殺也訊而罪定者則刑之其情可矜法可疑者則從而宥之也

司約下士二人府一人史二人徒四人

釋曰約諸侯萬民以言語相約束者則掌其約劑司盟下士二人府一人史二人徒四人

釋曰曲禮曰涖牲曰盟蓋以約辭告神殺牲歃血明著其信也黃氏曰商人作誓而民始畔周人作會而民始疑然則盟書果非先王之事乎先王以輔德信者也後世德信廢而明誓獨行於天下此民所以畔且疑也

陳氏曰先王之時結民以忠信誠慤之心維邦國以比小事大之禮然盟詛之末常不弛於天下使人明則知好惡幽則知信畏然後有同德而無離心則盟詛之輔於教也其可忽哉後世儒者或以疑周官過矣

職金上士二人下士四人府二人史四人胥八人徒八十人

釋曰掌受士之金罰貨罰者而金玉錫石丹青之出入亦總之焉

司厲下士二人史一人徒十有二人

釋曰犯政爲惡曰厲司厲主盜賊之兵器及坐盜賊之爲奴者

大人下士二人府一人史二人胥四人徒十有六人

釋曰司寇祭祀奉犬牲故大人屬秋官

司圜中士六人下士十有二人府三人史六人胥十有六人徒百有六十人

釋曰圜謂圜土也猶後世之獄城也

掌囚下士十有二人府六人史十有二人徒百有二十人

釋曰囚拘也主拘繫當刑殺者

掌戮下士二人史一人徒十有二人

釋曰戮猶辱也旣斬殺之又戮辱之

司隸中士二人下士十有二人府五人史十人胥二十人徒二百人

釋曰隸給勞辱之役者以罪人爲奴僕故在此司

隸爲五隸之長

罪隸百有二十人

釋曰盜賊之爲奴者

蠻隸百有二十人

釋曰征南夷所獲者

閩隸百有二十人

釋曰南蠻之別名

夷隸百有二十人

釋曰征東夷所獲者

貉隸百有二十人

釋曰征北夷所獲者

布憲中士二人下士四人府二人史四人胥四人徒四十人

釋曰憲表也主敷布憲法以昭示其民使之畏而不犯也

禁殺戮下士二人史一人徒十有二人

釋曰禁殺戮者禁民不得相殺戮也丘氏曰此言非天吏不可以殺人

禁暴氏下士六人史三人胥六人徒六十人

釋曰禁民不得相凌暴也王氏曰以刑教中則民

不暴者教官之事也以刑禁暴者刑官之事也

野廬氏下士六人胥十有二人徒百有二十人

釋曰廬野道之小室所以待行旅也十里有廬三

十里有候館則館大而廬小野廬氏掌國野道路

宿息之類故名官野

蜡氏下士四人徒四十人

蜡清預反

釋曰蜡骨肉腐臭蠅虫所蜡也月令曰掩骼埋骹

此官之職也以掌禁戒之事故在於此

雍氏下士二人徒八人

雍於勇反

釋曰掌隄防以止水者溝瀆澮之禁亦禁戒之事

萍氏下士二人徒八人

釋曰萍之草無根而浮以之名官主水禁取其不

沉溺

司寤氏下士二人徒八人

釋曰王氏曰寤而覺謂之寤使掌夜時非覺而不

寤者安能定其刻漏之早晚哉所以謂之司寤氏

也以宣王之時去成王之世未遠而君子之來朝

或以夜未央未艾則司寤之職不行可知矣此詩

人所以箴之也

司烜氏下士六人徒十有二人

釋曰烜火也王氏曰取明水火於日月而名官謂之司烜者易曰日以烜之蓋火本於日烜之而後明也然燿與烜皆火而司燿在夏官司烜列秋官者蓋司燿掌出入火南方之屬也司烜共明水火司冠所奉也故列司燿於夏而司烜在秋官也

條狼氏下士六人胥六人徒六十人

條徒歷反

釋曰條謂滌除也不蠲之物狼籍道上者則滌除之也

脩閭氏下士二人胥一人徒十有二人

釋曰脩治也閭謂里門王氏曰里有門所以通往

來扞制內外先王立官以脩治其事故名曰脩原曰自禁殺戮至脩閭氏十官皆譏防盜賊奸宄幾防嚴則奸宄息所以清刑之原歟惟蜡氏司烜二官乃蠲潔與奉明水火之官為祭祀而設者

冥氏下士二人徒八人

釋曰冥氏掌除猛獸之害人者王氏曰欲攻猛獸必使之冥然而不覺然後可以獲所以名官謂之冥氏

庶氏下士一人徒四人

釋曰庶者驅除蠱之害毒王氏曰先王以善政養

天下之民既庶且繁故設官以除蠱毒之害謂之庶氏也

宄氏下士一人徒四人

釋曰宄氏主搏蟄獸所藏者

翬氏下士二人徒八人

翬音翅

釋曰翬鳥羽鳥之飛在翬攻猛鳥者必攻其翬然

後可獲故名官曰翬氏

柞氏下士八人徒二十人

釋曰柞除木之名除木者必先刊剝之詩曰載芟

載柞。王介甫曰先王之於林麓也設虞衡為厲

禁以掌之又置柞氏攻之者欲其材木為用則設

官為厲禁以養蕃之欲其地宅民稼穡則刊剝而

化之帝省其山松柏斯兌柞械斯拔則虞衡之官

脩焉作之屏之其蓄其翳脩之平之其灌其例則

柞氏之職用焉

薙氏下士二人徒二十人

釋曰薙他計反是書薙或作夷芟夷蘊崇之皆去

草也薙氏掌夷五地之草以待耕種

砮蒺氏下士一人徒二人

砮讀為擿它歷反蒺倉獨反

釋曰砮擿也蒺巢也摘其巢而去之妖鳥不復至

翦氏下士一人徒二人

又翦者斷也

釋曰翦除也主除蠱毒者謂之翦斷滅之義也

赤友氏下士一人徒二人

友音跋

釋曰赤友猶言抃拔除去之也主除蟲豸自埋於

墻屋之中者

蝮氏下士一人徒一人

釋曰蝮蛙也月令曰蝮蝮鳴

壺涿氏下士一人徒二人

涿涉角反

釋曰壺尾鼓也涿擊也所以驚水蟲也

庭氏下士一人徒二人

自碧族氏以下六官今已去之

釋曰主射妖鳥令國中潔清如庭也自冥氏至庭

氏十二官皆順天時以去民之害雖若傷殘乃所

以仁愛此天之肅殺之意故皆屬乎秋官○陳及

之曰古之王者鍾鼓管絃以養其內威儀文物以

養其外出則有虎賁氏夾道而趨居則有士庶子

掌守其居止行幸未嘗一日忘武備自儒生論之

以為無他事矣先王猶恐猛獸之隱伏毒蟲之竊

發狸蟲之潛聽水蟲之巧伺皆足以害人身者妖

鳥之聲鼃黽之音亦足以亂人心一物不去於治

身養心爲有缺則是數官之設非得已而不已者也豕突乘輿熊當御坐雖當時所致亦王制有不足耳所謂方書歲月日星之號以去妖鳥攻滎以攻蟲物蜃灰以攻埋蟲牡鞠以去鼃鼃炮土之鼓以去水蟲救月之矢以射妖鳥非明於庶物精義入神者不能知也

原曰先儒之疑周禮者正謂此十數官之類瑣細之甚非大義所關先王爲此而設官有名爵有胥徒且有官必有祿則是爲民除害者甚微而厲民爲養者甚巨此有識者所以謂周禮之決不可信

者在此也然不知先王賢者在位能者在職皆鄉遂之民爲之故有此疑以愚觀之先王之於天下使天地萬物各得其所故凡天下之民有一德可錄一能可使皆有以處之故凡天地間有害人之物利人之事天下之人善其物能其事者先王皆必使之致於用庶物之微或利或害皆必處之各當焉裁成輔相其功正在於此烏可以其小而忽之其所設之官皆於民伍之中有善其事者使之任其職以其官之秩爲辨施舍之等而已夫豈如後世專專設官而履其士任者哉故知能者在職

之說可無疑於周禮矣

銜枚氏下士二人徒八人

釋曰枚狀如箸橫銜之為之繯結於頤中以止言語囂譁也此多軍中所用在此者以禁戒之事及祭祀亦用焉故也

伊耆氏下士一人徒二人

釋曰此官共王之齒杖及耆老之杖咸其有功於耆老矣以伊耆名官者蓋古王者始為蜡以息老物者號伊耆氏後王識伊耆之舊以各官及後世以其官為姓焉

大行人中大夫二人小行人下大夫四人司儀上士八人中士十有六人行夫下士三十有二人府四人史八人胥八人徒八十人

釋曰宗伯掌禮司馬掌諸侯之政令行人掌天下之諸侯往來交際之禮者以掌禮宜在春官以掌諸侯宜在夏官屬刑官何也蓋欲刑官以刑約束天下諸侯使不敢違於禮也其意深矣唐氏曰伯夷降典而繼以析民惟刑周禮行人之官必屬之司寇此古者禮刑表裏之意也洪範六曰司寇七曰賓論語齊之以禮齊之以刑亦此意也

環人中士四人史四人胥四人徒四十人

釋曰環猶圍也主賓客任器而為之守衛○王氏曰夏官有環人秋官復有環人者蓋夏官環人掌環四方之故取周巡往來若環之無端也秋官環人掌環賓客之任器取周圍保獲若環之無隙也官名雖同而意則異

象胥每翟上士一人中士二人下士八人徒二十人

釋曰通夷狄之言者象胥其有才智者也東方曰寄南方曰象西方曰狄韞北方曰譯今總名曰象者周之德先致南方也王氏曰化自北而南以言其所致者遠也

掌客上士二人下士四人府一人史二人胥二人徒二十人

釋曰專掌四方賓客牢禮之數者不屬禮官以與行人為類

掌訝中士八人府二人史四人胥四人徒四十人

釋曰訝迎也主迎賓客者王氏曰秋官有訝士又有掌訝者蓋訝士刑官也兼掌獄訟掌訝惟以逆賓客為主而已

掌交中士八人府二人史四人徒三十有二人

釋曰交者主交通以結諸侯之好王氏曰天地不交而萬物不生上下不交而功勳不成先王所以立掌交之官也與

掌察四方中士八人史四人徒十有六人

釋曰掌察主督察邦國之事者言四方者每方中士二人史一人徒四人也

掌貨賄下士十有六人史四人徒三十有二人

釋曰掌邦所致貨賄

朝大夫每國上士二人下士四人府四人史二人庶子八人徒二十人

釋曰此王朝之士也以其主都家之國治其事重故總名之朝大夫也庶子者蓋亦主采地之諸子今在府史之下蓋官長所辟除也

都則中士一人下士二人府一人史二人庶子四人徒八十人

釋曰主都家之八則者也太宰以八則治都鄙

都士中士二人下士四人府二人史四人胥四人徒四十人

家士亦如之

按春官則有都宗人家宗人掌其祭祀夏官則有

都司馬家司馬掌其軍旅秋官則有都士家士掌
其獄訟蓋都鄙之君皆在王朝而其國事皆王官
治之所謂天子使治其國者也然則司徒司空
何以無都家之官曰司徒縣師是也縣師專治都
家之正官其祭祀軍旅獄訟又王朝之官治之所
謂都不可耦國而分其權也先王之意深矣

